

發 刊 詞

張 惠 長

昔者 總理之爲民報作發刊詞也，有曰，「非常革新之說，其理想灌輸於人心，而化爲常識，則其去實行也近。」大哉言乎，凡社會一切事物，其進化公例，未始不循此也。

溯吾國航空之發軔，在遜清末季，其時民衆心理，多謂航空之功用，卑卑不足道，得此聊以備作戰時之展望，不過爲流動式之碉樓而已，迨民國九年，莫榮新據粵，粵軍環攻而未下，楊仙逸先烈乃駕機擲彈，轟振武樓，莫始宵遁，其時民衆心理，雖謂航空功用，稍有寸進，然亦祇足供擲彈之利便而已，惟我總理，具先知先覺之能，獨以爲航空功用，不第施於軍事，佔重要部份，擴而充之，更可於民生衣食住行四者之中，藉此而解決行之需要，且吾國陸行海行兩權，俱已受外力攙入，猶幸空行權未喪失，乘時而發展航空事業，以收桑榆，誠不可緩，故特提出航空救國一語，諄諄以囑民衆，其時民衆若將信焉，若將疑焉，蓋非常革新之說，驟難使後知後覺者之一朝共喻也，今何時乎，經數年來戰役，航空功用，已大顯著，國人皆知總理航空救國一語，昭昭然揭日月以行，由是而擬增空軍實力以固國防，由是而擬辦民用航空以利交通，如春風原草，及時滋長，向所疑爲非常革新者，今殆視爲習見熟聞矣。化爲常識，則其去實行也近，此固一可喜可快之事，雖然，航空救國不可以空言，須有相當學術以副之，此相當學術，如何而能灌輸

於民衆，使化爲常識，在政府之操有教育權者，宜知所勉，在航空專才之人，尤宜知所勉，語不云乎，始作簡，畢將巨，故吾於本刊之編，事不容已，刊內記載，關於學術者十而七八，期乎實用之歸，而公文一類，附諸刊末，庶幾在公任事，與人以共見云爾，則夫本刊之編，對於航空救國，其諸中流之一壺，爲山之一簣也歟，君子。

七，十，二十。

航 空 救 國

孫文書

